

1 בראשית ברא אלהים את השמים ואת הארץ:

2 והארץ היתה תהו ובהו וחשך על־פני תהום

ורוח אלהים מרחפת על־פני המים:

3 ויאמר אלהים יהי אור ויהי־אור:

4 וירא אלהים את־האור כי־טוב ויבדל אלהים בין האור ובין החשך:

5 ויקרא אלהים לאור יום ולחשך קרא לילה ויהי־ערב ויהי־בקר יום אחד:

6 ויאמר אלהים יהי רקיע בתוך המים ויהי מבדיל בין מים למים:

7 ויעש אלהים את־הרקיע ויבדל בין המים אשר מתחת לרקיע

ובין המים אשר מעל לרקיע ויהי־כן:

8 ויקרא אלהים לרקיע שמים ויהי־ערב ויהי־בקר יום שני: פ

9 ויאמר אלהים יקוו המים מתחת השמים אל־מקום אחד

ותראה היבשה ויהי־כן:

¹⁰ ויקרא אלהים ליבשה ארץ ולמקוה המים קרא ימים וירא אלהים כי־טוב:

¹¹ ויאמר אלהים תדשא הארץ דשא עשב מזריע זרע

עץ פרי עשה פרי למינו אשר זרעו־בו על־הארץ ויהי־כן:

¹² ותוצא הארץ דשא עשב מזריע זרע למינהו

ועץ עשה־פרי אשר זרעו־בו למינהו וירא אלהים כי־טוב:

¹³ ויהי־ערב ויהי־בקר יום שלישי:

¹⁴ ויאמר אלהים יהי מארת ברקיע השמים להבדיל בין היום

ובין הלילה והיו לאתת ולמועדים ולימים ושנים:

¹⁵ והיו למאורת ברקיע השמים להאיר על־הארץ ויהי־כן:

¹⁶ ויעש אלהים את־שני המארת הגדלים

את־המאור הגדל לממשלת היום ואת־המאור הקטן

לממשלת הלילה ואת הכוכבים:

¹⁷ ויתן אתם אלהים ברקיע השמים להאיר על-הארץ:

¹⁸ ולמשל ביום ובלילה ולהבדיל בין האור ובין החשך

וירא אלהים כי-טוב:

¹⁹ ויהי-ערב ויהי-בקר יום רביעי: פ

²⁰ ויאמר אלהים ישרצו המים שרץ נפש חיה

ועוף יעופף על-הארץ על-פני רקיע השמים:

²¹ ויברא אלהים את-התנינם הגדלים ואת כל-נפש החיה הרמשת

אשר שרצו המים למינהם ואת כל-עוף כנף למינהו וירא אלהים כי-טוב:

²² ויברך אתם אלהים לאמר פרו ורבו ומלאו את-המים

בימים והעוף ירב בארץ:

²³ ויהי-ערב ויהי-בקר יום חמישי:

²⁴ ויאמר אלהים תוצא הארץ נפש חיה למינה בהמה ורמש וחיתו־ארץ למינה ויהי־כן:

²⁵ ויעש אלהים את־חית הארץ למינה ואת־הבהמה למינה

ואת כל־רמש האדמה למינהו וירא אלהים כי־טוב:

²⁶ ויאמר אלהים נעשה אדם בצלמנו כדמותנו וירדו בדגת הים

ובעוף השמים ובבהמה ובכל־הארץ ובכל־הרמש הרמש על־הארץ:

²⁷ ויברא אלהים את־האדם בצלמו בצלם אלהים ברא

אתו זכר ונקבה ברא אתם:

²⁸ ויברך אתם אלהים ויאמר להם אלהים פרו ורבו ומלאו את־הארץ

וכבשה ורדו בדגת הים ובעוף השמים ובכל־חיה הרמשת על־הארץ:

²⁹ ויאמר אלהים הנה נתתי לכם את־כל־עשב זרע זרע

אשר על־פני כל־הארץ ואת־כל־העץ אשר־בו פרי־עץ זרע זרע

לכם יהיה לאכלה:

³⁰ ולכל-חית הארץ ולכל-עוף השמים ולכל רומש על-הארץ

אשר-בו נפש חיה את-כל-ירק עשב לאכלה ויהי-כן:

³¹ וירא אלהים את-כל-אשר עשה והנה-טוב מאד ויהי-ערב ויהי-בקר יום
השני: